

四庫全書

集部

欽定四庫全書

集部

杼山集卷一至三

詳校官太常寺少卿臣陳桂森

檢討臣何思鈞覆勘

覆校官中書臣呂雲棟

校對官助教臣蔡鎮

謄錄舉人臣張仲芳

欽定四庫全書

集部二

杼山集

別集類一唐

提要

臣等謹案杼山集十卷唐僧皎然撰案唐書  
藝文志皎然字清晝湖州人謝靈運十世孫  
居杼山顏真卿為刺史集文士撰韻海鏡源  
預其論著貞元中取其集藏集賢御書院刺  
史于頔為序此集卷數與唐志合頔序亦存

益猶 本前有贊寧所為傳益自高僧傳錄  
入末有集外詩則毛晉所補緝也皎然及貫  
休齊己皆以詩名今觀所作弱於齊己而雅  
於貫休在中唐作者之間可廁末席集末附  
載雜文數篇則聊以備體非其所長矣別本  
附刊杼山詩式一卷按唐志畫公詩式詩評  
皆載文史類中不附本集今亦析出別著錄  
焉乾隆四十一年五月恭校上

總纂官

臣紀昀

臣陸錫熊

臣孫士毅

總校官

臣陸費墀

臣陸費墀

欽定四庫全書

提要

杼山集原序

詩自風雅道息二百餘年而騷人作其旨愁思其文婉麗亡楚之變風歟至西漢李陵蘇武始全為五言詩體源於風流於騷故多憂傷離遠之情梁昭明所撰文選錄古詩十九首亡其名氏觀其辭蓋東漢之世亦蘇李之流也洎建安中王仲宣曹子建鼓其風晉世陸士衡潘安仁揚其波王曹以氣勝潘陸以文尚氣勝者魏祖興武功於二京已覆文尚者晉武亡帝圖於劉淵肇亂

觀其人文興亡之跡人馬度哉人馬度哉宋高祖平桓  
玄定江表文帝繼業五十年間江左寧謐魏晉文章鬱  
然復興康樂侯謝靈運獨步江南俯視潘陸其文炳而  
麗其氣逸而暢驅風雷於江山變晴昏於洲渚煙雲以  
之慘淡景氣為其澄霽信江表之文英五言之麗則者  
也迨於齊世宣城守謝玄暉亦得其辭調涵於氣格不  
侔康樂矣梁陳已降雖作者不絕而五言之道不勝其  
情矣有唐吳興開士釋皎然字清晝即康樂之十世孫



得詩人之奧旨傳乃祖之菁華江南詞人莫不楷範極  
於緣情綺靡故辭多芳澤師古興制故律尚清壯其或  
發明玄理則深契真如又不可得而思議也貞元壬申  
歲余分刺吳興之明年集賢殿御書院有命徵其文集  
余遂採而編之得詩筆五百四十六首分為十卷納於  
延閣書府上人以余嘗著詩述論前代之詩遂託余以  
集序辭不獲已畧志其變上人之植性清和稟質端懿  
中秘空寂外開方便妙言說於文字了心境於定惠又

釋門之慈航智炬也余游方之內者何足以扣玄關謝  
氏世為詩人豈佛書所為習氣云爾于頓撰

欽定四庫全書

杆山集卷一

唐 釋皎然 撰

五言奉酬于中丞使君郡齋臥病見示一首

宿昔祖師教了空無不可枯槁未死身理心寄行坐仁  
公施春令和風來澤我生成一草木大道無負荷論入  
空王室明月開心胸性起妙不染心行寂無蹤若非禪  
中侶君為雷次宗比聞朝端名今貽郡齋作真思凝瑤  
瑟高情屬雲鶴扶得驪龍珠光彩曜掌握若作詩中友

君為謝康樂盤薄西山氣貯在君子衿澄澹秋水影用  
為字人心群物如鳬鷺游翺愛清深格居第一品高步  
凌前躅精義究天人四坐聽不足伊昔柳太守曾賞汀  
洲蘋如何五百年重見江南春公每省往事詠歌懷昔  
辰以茲得高臥任物化自淳還因訪禪隱知有雪山人

附郡齋臥疾贈畫上人

上人早名皎然晚字畫

湖州刺史于頔

夙陪翰墨徒深論窮文格麗則風騷後然公我詞客晚

依方外友極理探精蹟習合南北宗畫公我禪伯光明  
性不染故我行貞白隨順令得解故我言芳澤雪水漾  
清潄吳山橫碧岑含珠復蘊玉價重雙南金的皦曜奇  
彩淒淒流雅音商聲發楚調調切諧瑤琴吳山為我高  
雪水為我深萬景徒有象孤雲本無心衆木豈無聲倚  
桐有清響衆耳豈不聆鍾期有真賞高潔古人操素懷  
夙所仰覲君水雪姿祛我淫滯想常吟柳惲詩茗浦久  
相思逮此遠為郡蘋洲芳草衰逢師年臘長值我病容

羸共話無生理聊用契心期

五言贈李中丞一首

深沉間外畧奕世當榮寄地裂大將封家傳介珪瑞至  
今漳河俗猶受仁人賜公初鎮惟邢決勝無精兵重圍  
逼大敵六月守孤城政用仁恕立恩繇賞罰明遂令麾  
下士感德不顧生于時聞王師諸將兵頗黷天子狩南  
漢煙塵滿函谷純臣獨耿介下士多反覆明公仗忠節  
一言感萬夫物性如蒺藜化作春蘭敷見說金被爍終

期玉有瑜移官萬里道君子情何如伊昔避事心乃是  
方袍客頓了空王旨仍高致君策安知七十年一朝值  
宗伯言如及清風醒然開我懷宴息與游樂不將衣褐  
乖海底取明月鯨波不可渡上有巨蟒吞下有毒龍護  
一與吾師言乃於中心悟咄哉冥冥子胡為自塵汚

五言杼山禪居寄贈東溪吳處士馮一首

青雲何潤澤下有賢人隱路入菱湖深跡與黃鶴近野  
風歌白芷山月搖清軫詩祖吳叔庠致君名不盡身當

青山秀

詩曰家住青山下青山有吳筠故宅後改為吳筠山

文體多郢聲澄澈湘

水碧沈寥楚山青時人格不同至今罕知名昔賢敦師友此道君獨行既得廬霍趣乃高雷遠情別時春風多掃盡雪山雪為君中夜起孤坐石上月悠然遺塵想邈矣達性說故人不在茲幽桂惜未結

五言妙喜寺高房期靈澈上人不至重招之一首

晨起峰頂心懷人望空碧掃雪開寺門灑水淨僧席言笑形外阻風儀想中覲馳心驚葉動傾耳聞泉滴豈慮



咆虎逢乍疑崩湍隔前期或不顧知爾隳常格如今誰  
山下秋霖步漸瀝吾亦聊自得行禪荷輕策松聲暢幽  
情山意導遐跡舉目無世人題詩足竒石貧山何所有  
特此邀來客

五言奉和薛員外誼贈湯評事衡反招隱之跡兼  
見寄十二韻

喜友稱高儒曠懷美無度近為東田誘遂耽西山趣庭  
有介隱心得無雲泉誤府公中司貴頻貽咫尺素郡佐

仙省高亦贈瓊瑤句誚茲長往志紆彼獨遊步禪子方  
外期夢想山中路艱難親稼穡晨夕苦煙霧曷若孟嘗  
門日榮國士遇鏗鏘聆綺瑟攀折通瓊樹幽踐隨鹿麋久  
期怨蟾兔情同不繫舟有跡道所惡

五言答黎士曹黎生前適越後之楚

楚木紛如麻高松自孤直願得苦寒枝與君比顏色故  
鄉渺天末羈旅滄江隅委質在忠信苦心無變渝何繇  
表名義贈君金轆轤何以美知才投我懸黎珠遽為千

里別南風思越絕愛君隨海鷗倚棹宿沙月不棲惡木

上肯蹈巴蛇穴

台人表朝逆命故君不踐其土

一上蕭然峰擬蹤幽人

輟晨興獨西望郢水期沂沿夜到洞庭月秋經雲夢天  
黎生知吾道此地不潛然欲寄楚人住學拏漁子船奈  
何北風至攪我窓中絃遊子動歸思江籬亦綿綿篋中  
封禪書欲獻無繇緣豈乏晨風翼翻飛到日邊

五言荅豆盧次方

吾愛道交論為高貴世名昔稱柴桑令今聞豆盧生彼

生清淮氣獨鍾文中彩近作公讌詩如逢何柳在吾用  
古人耳採君四坐珍賢士勝朝暉溫溫無冬春朝暉爍  
我肌賢士清我神微爾與雲鵠幽懷何繇申別來秋風  
至獨坐楚山碧高月當清冥禪心正寂歷增波徒相駭  
人遠情不隔有書遺瓊什以代貂襜褕風教凌越絕聲  
名掩吳趨懸壁安可耐徒倚還踟躕

五言荅蘇州韋應物郎中

詩教殆淪缺庸音互相傾忽觀風騷韻會我夙昔情蕩

漾學海資儲為詩人英格將寒松高氣與秋江清何必  
鄴中作可為千載程受辭分虎竹萬里臨江城到日掃  
煩政況今休黷兵應憐禪家子林下寂無營跡隳世上  
華心得道中精脫畧文字累免為外物撓書衣流埃積  
硯石駁蘚生恨未識君子空傳手中瓊安可誘我性始  
願愆素誠為無驚鶩音繼公雲和笙吟之向禪數反媿  
幽松聲

五言答鄭方回

獨禪外念入中夜不成定顧我顛顚容澤君陽春詠詞  
貞思且逸瓊彩何暉映如聆雲和音况覩聲名盛琴語  
掩為去聲聞山心聲宜聽是時寒光澈萬境澄以淨高秋

日月清中氣天地正遠情偶茲夕道用增寥曩思君處  
虛空一操不可更時美城北徐家承谷口鄭軒車未有  
轍蒿蘭且同徑莊生誠近名夫子罕言命是以耕楚田  
曠然殊獨行姜蕤鸞鳳彩特達珪璋性通隱嘉黃綺高  
儒重荀孟世汚平聲我未起道蹇吾猶病逸翮思冥冥潛

鱗樂游泳宗師許學外恨不逢孔聖說詩迷頽靡偶俗  
傷趨競此道誰共詮因君情欲罄

五言答俞校書冬夜

夜閑禪用精空界亦清迴子真仙曹吏好我如宗炳一  
宿覲幽勝形清煩慮屏新聲殊激楚麗句同歌郢遺此  
感予懷沉吟忘夕永月彩散瑤碧示君禪中境真思在  
杳冥浮念寄形影遙得四明心

答四明

何須蹈岑嶺詩情

聊作用空性惟寂靜若許林下期看君辭簿領

五言妙喜寺達公禪齋寄李司直公孫房都曹德

裕從事方舟顏武康士騁四十二韻

我祖傳六經精義思朝徹

莊子曰守之九日而後能外生外生而後能朝徹

方

舟頗周覽逸書亦備閱墨家傷刻薄

墨流刻薄而不仁可以理身不可以

濟世儒氏知優劣植庶可彫苦心未嘗輟中年慕仙術

永願傳其訣歲駐若木景日食瓊禾屑嬋娟羨門子斯

語豈徒設天上生白榆歲凝信好折實可反柔顏花堪

養玄髮求之性分外業棄金亦竭藥化成白雲形彫辭



素穴

素穴山名

一聞西天旨初禪已無熱

第四禪中有天名無熱無三災之患

故以為名今初禪即得蓋詩人美已證超出常

涓子非我宗然公有真訣却尋

邱壑趣始與纓紱別野飯敵膏粱山楹代藻稅與君北  
巖侶遊寓日常眈靜對春谷泉晴披陽林雪境清覺神  
王道勝知機滅詣寂長杳冥忘歸暫采擷物生豈有心  
麗容俟予別桂子何莫苓琪葩亦皎潔此木生意高亦  
與衆芳列賞墨識屢換省躬悟彌切微尚若不虧足以  
全吾節北風吹蕙帶蕭寥聞蜻蛚宿昔廬峰期流芳已

再歎不有清屏鑒使我商絃絕願寄千里心月高不可  
掇優游邦之直遠矣踵前烈立俗忘毀譽遇物遺巧拙  
真氣獨條然軒裳詎能絀都曹風韻整綱紀信明決於  
交必傾寫立行豈矜伐政與清渭同分流自澄澈裴侯  
資亮直中誠豈徒說古人比明義清士願交結溫溫躬  
珪彩終始聲不缺顏生烟介士有志不可越仗義冒險  
難持操去淄涅世論高二賢即魯公猶子也賢賢繼前哲四子  
遭明盛衰然皆秀傑理名雖殊迹悟道寧異轍愛爾竹

栢姿為予寒不折

五言遙酬袁使君高春暮行縣過報德寺見懷

江春行求瘼偶與真境期見說三陵下前朝聞佛祠停  
舟仰麗剎繡組發香墀咫尺空界色天人花落時盛游  
限羸疾悚踈瞻旌旗峰翠羨閑步松聲入遙思素高淮  
陽理况負東山姿迨此一登覽深情見新詩

五言冬日遙和盧使君幼平綦母居士游法華寺

高頂臨湖亭

仁坊標絕境，廡宇躡高蹤。  
天曉纔分剎，風傳欲盡鍾。  
城中歸路遠，湖上碧山重。  
水照千花界，雲開七葉峰。  
寒空艾綬滿，空翠白綸濃。  
逸韻知難繼，佳遊恨不逢。  
仍聞撫禪石，為我久從容。

五言秋日遥和盧使君遊何山寺宿敷上人房論  
涅槃經義

江郡當秋景，期將道者同。  
跡高憐竹寺，夜靜賞蓮宮。  
古磬清霜下，寒山曉月中。  
詩情緣境發，法性寄筌空。  
翻譯

淮南本何人繼謝公

五言酬秦山人系題贈

出齋步杉影手自開禪扉花滿不汚地雲多從觸衣思  
山石蘚淨欸客露葵肥果得宗居士論心到極微

五言奉酬袁使君高寺院新亭對雨

其亭即使  
君所創

茲亭跡素淺勝事併隨公法界飄香雨禪窓灑竹風浮  
煙披夕景高鶴下秋空冥寂四山久寧期此會同

五言奉酬顏使君真卿見過郭中寺寺無山水之

賞故予述其意以荅焉

州西柳家寺禪舍隱人間證性輕觀水棲心不買山履  
聲知客貴雲影悟身閑彥會前賢事方今可得攀

五言酬烏程楊明府華雨後小亭對月見呈

夜涼喜無訟霽色搖閑情暑退不因雨陶家風自清凝  
絃停片景發詠靜秋聲何事禪中隱詩題忽記名

五言自蘇州訪醫迴酬盧士關判官見贈

尋醫初疾理忽憶故山雲遠訪桑公子還依柳使君周

旋承惠愛佩服比蘭薰從事因高唱秋風起處聞

五言題沈道士新亭

何處好攀躋新亭俯舊溪坐中千里近簷下四山低小  
浦依林曲迴塘遶郭西桃花春滿地歸路莫相迷

五言送盧仲舒移家海陵

世故多離散東西不可嗟小秦非本國楚塞後移家海  
島無隣里鹽居少物華山中吟夜月相送在天涯

五言陪盧使君登樓送方巨之還京一首

萬里汀洲上東樓欲別難春風潮水漫正月柳條寒旅  
逸逢漁浦清高愛烏冠雲山寧不起今日向長安

五言同裴錄事樓上望

還食高樓上湖山向晚晴桐花落萬井月影出重城水  
竹涼風起簾幃暑氣清蕭蕭獨無事因見蒞人情

雜言寓興

天下生白榆白榆直上連天根高枝不知幾萬丈世人  
仰望徒攀援誰能上天採其子種向人間笑桃李因問



老仙求種法老仙咍我口不荅始知此道無所成還如  
瞽夫學長生

七言寄常一上人

鴈塞五山臨汗漫雲州一路出青冥何因請住嘉祥寺  
內史新修湖上亭

五言送祕上人遊京

共居方異路山伴與誰同日冷行人少時清古鎮空煖  
瓶和雪水鳴錫帶江風撩亂終南色遙應入夢中

五言賦得啼猿送客

萬里巴江外三聲月峽深何年有此路幾客共沾襟斷  
壁分垂影流泉入苦吟淒涼離別後聞此更傷心

五言南樓望月

夜月家家望亭亭愛此樓纖雲溪上斷踈柳影中秋漸  
映千峰出遙分萬派流關山誰復見應獨起邊愁

五言尋陸鴻漸不遇

移家雖帶郭野徑入桑麻近種籬邊菊秋來未著花扣

門無犬吠欲去問西家報道山中去歸時每日斜

五言懷舊山

一坐西林寺從來未下山不因尋長者無事到人間宿  
雨愁為客寒花笑未還空懷舊山月童子念經閑

五言宿吳匡山破寺

雙峰百戰後真界滿塵埃蔓草緣空壁悲風起故臺野  
花寒更發山月暝還來何事池中水東流獨不回

五言九月十日

愛爾柴桑隱名溪近訟庭掃沙開野步搖舸出閑汀宿  
簡邀詩伴餘花在酒瓶悠然南望意自有峴山情

七言晚秋破山寺

秋風落葉滿空山古寺殘燈石壁間昔日經行人去盡  
寒雲夜夜自飛還

七言青陽上人院說金陵故事

君說南朝全盛日秣陵才子更多人千年秋色古池館  
誰見齊王西邸春

七言送僧之京師

綿綿渺渺楚雲繁  
萬里西歸望國門  
禪子初心易悽斷  
秋風莫上少陵原

七言送許丞還洛陽

剡茗情來亦好斟  
空門一別肯沾襟  
悲風不動罷瑤軫  
忘却洛陽歸客心

七言題湖上草堂

山居不買剡中山  
湖上千峰處處閑  
芳草白雲留我住

世人何事得相關

五言酬李司直縱諸公冬日遊妙喜寺題照昱二

上人房寄長城潘丞述

達賢貴貞隱常懼迹不滅遂與永公期遺身坐林樾華  
軒何麟麟為我到幽絕心境寒草花空門青山月潘生  
獨不見清景屢盈缺林下常寂寥人間自離別何時解  
輕佩來稅邱中轍

五言贈烏程李明府伯宜沈兵曹仲昌

水國苦彫瘵東臯豈遺泰雲陰無盡時日出常帶雨昨夜西溪漲扁舟入簷廡野人同鳥巢暴客若峰聚歲晏無斗粟寄身欲何所空羨鸞鶴姿翩翩自輕舉

五言奉酬顏使君真卿王員外圓宿寺兼送員外使廻

魯公邀省客貧寺人過少錦帳惟野花竹屏有窗篠朝行石色淨夜聽泉聲小釋事情已高依禪境無擾超遙長路首悵望空林杪離思從此生還將此心了

五言杼山上峰和顏使君真卿袁侍御五韻賦得  
印字仍期明日登開元寺樓之會

道情寄遠岳放曠臨千仞香路延絳騶華泉寫金印日  
歌諸天近雨過三華潤留客雲外心忘機松中韻靈嘉  
早晚期為布東山信

五言同薛員外誼喜雨詩兼上楊使君

積旱忽飛澍烝民心亦傾郊雲不待簇雨色飛江城  
稼濯又發敗荷滋更榮時隨霧縠重乍集柳絲輕一宿



恐魚飛數朝徵鶴鳴毒暑澄為冷高塵滌還清乃知陰  
騭數制在造化情及此接歡賀臨風聞頌聲

五言南湖春泛有客自北至說友人岑元和見懷  
因叙相思之志以寄焉

故人隔楚水日夕望芳洲春草思眇眇征雲暮悠悠心  
期無形影跡曠成阻修有客江上至知君佐雄州鏗鏘  
佩蒼玉蹀躞驅絳騶伊昔中峰心從來非此流資予長  
生訣予嘗授以胎息之訣希彼高仙儔此情今如何宿昔師吾謀

別後謁禪老更添石室籌深見人間世飄如水上漚蟬  
號齊王邸月苦隋帝樓聲華盡冥冥麋鹿徒呦呦我有  
一字教坐然遺此憂何煩脫珪組不用辭王侯祇在名  
位中空門魚可遊

五言同薛員外誼大旱感懷寄魚呈上楊使君

皇天鑒不昧恤想何亢極絲雨久愆期綺霞徒相惑陰  
雲舒又卷濯枝安可得涸井不累瓶乾溪一憑軾赤地  
芳草死飈塵驚四塞戎寇夜刺閨民荒歲傷國賴以王

猷盛中原無凶慝楊公當此晨省災常旰食獨感下堂

雨

自州南諸鄉降甘澤長城顧堵平地雨一尺水分流澤數鄉也

偏嘉越境或秋郊天

根見我疆看稼穡請迴雲漢詩為君歌樂職

五言兵後早春登故鄣南樓望崑山寺白鶴觀示

清道人并沈道士

新陽故樓上眇眇傷遐睎違世情易忘羈時得無倦春  
歸華柳發世故陵谷變擾擾陌上心悠悠夢中見蒼林  
有靈境杳映遙可羨春日倚東峰華泉落西甸鍾聲在

空碧幡影搖蔥蒨緬想山中人神期如會面別離芳月  
積岐路浮雲遍正值入空門仙君依苦縣隳形捨簪紱  
烹玉思精鍊事外宜我心人間豈予戀身遺世自薄道  
勝名必賤耳目何所娛白雲與黃卷

五言酬烏程楊明府華將赴渭北對月見懷

釋印及秋夜身閑境亦清風襟自瀟灑月意何高明聞  
說武安君萬里驅妖精開府集秀士先招士林英晉家  
用元凱亦是魯諸生北望撫長劍感君知己行邊塵昏

玉帳殺氣凝金鐙大敵折齊俎一書下聊城翻飛青雲

路宿昔滄洲情

答云詩中悠然顧山侶之句

五言酬邢端公濟春日蘇臺有呈袁州李使君魚

書并寄辛陽王三侍御

大賢當佐世堯時難退身如何丹霄侶却在滄江濱柳  
色變又遍鶯聲聞亦頻賴逢宜春守共賞南湖春營道  
知止足飾躬無緇磷家將詩流近跡與禪僧親放曠臨  
海門翱翔望雲津雖高空王說不久山中人

上句答端公學無為

之句

五言奉和裴使君清春夜南堂聽陳山人彈白雪  
春宵凝麗思閑坐開南園郢客彈白雪紛綸發金徽散  
從天上至集向瓊臺飛絃上疑颯颯虛中想霏霏通幽  
鬼神駭合道精鑒稀變態風更入含情月初歸方知阮  
太守一聽識其微

五言答孟秀才

羸疾依小院空閑趣自深躡苔憐靜色掃樹共芳陰物

外好風至意中佳客尋虛名誰欲累世事我無心投贈  
荷君芷馨香滿幽襟

五言酬崔侍御見贈

市隱何妨道禪棲不廢詩與君為此說長破小乘疑

五言贈柳喜得嵩山法門自號嵩山老

一見嵩山老吾生恨太遲問君年幾許曾出上皇時

五言酬李補闕紆

不住東林寺雲泉處處行近臣那得識禪客本無名

五言湖南蘭若示大乘諸公

未到無為岸空憐不繫舟東山白雲意歲晚尚悠悠

七言兵後經水安法空寺寄悟禪師

其寺賊所焚

常說人間法自空何言出世法還同微蹤舊是香林下  
餘燼今成火宅中後夜池心生素月春天樹色起悲風  
吾知世代相看盡誰悟浮生似影公

七言春日村山寄李員外縱

南山唯與北山隣古樹連拳伴我身黃鶴有心多不住



白雲無事獨相親  
閑持竹錫深看水  
嬾繫麻衣出見人  
欲掇幽芳聊贈遠  
郎官那賞石門春

七言酬秦山人贈別二首

知君高隱占賢星  
卷葉時時注佛經  
姓被名公題舊里  
秦君詩將麗句號新亭

麗句亭

來觀新月依清室  
欲漱香

泉護觸瓶我有主人江太守  
如何相伴住禪靈

江淹為宣城守

常會禪  
靈寺

又

誰知臥病不妨禪跡寄詩流性似偏葉示黃金童子愛  
書題青字古人傳時高獨鶴來雲外每羨閑花在眼前  
對此留君還欲別應思石澗訪春泉

七言山居示靈澈上人

清明路出山初暖行踏春蕪看茗歸乍削柳枝聊代札  
時窺雲影學裁衣身閑始覺隳名是心了方知苦行非  
外物寂中誰似我松聲草色共無機

七言遥和康錄事李侍御夢小寒食夜重集康氏

園林

習家寒食會何頻，應恐流芳不待人。  
已愛治書詩句逸，更聞從事酒名新。  
庭蕪暗積承雙履，林蕩雷飛灑幅巾。  
誰見秣園時節共，還持綠茗賞殘春。

七言釋裴循春愁

蝶舞鶯歌喜歲芳，柳絲裊裊蕙帶長。  
江南春色共君有，何事君心獨自傷。

七言西白溪期裴方舟不至

望君不見復何情  
野草閑雲處處生  
應向秦時武陵路  
花間寂歷一人行

七言勞山憶棲霞寺道素上人久期不至

遠寺蕭蕭獨坐心  
山情自得趣何深  
泉聲稍滴芙蓉漏  
月影纔分鸚鵡林  
滿地雲輕長礙屐  
繞松風近每吹襟  
貪閑不記前心偈  
念別聊為出世吟  
更待花開遍山雪  
山山相似若為尋

七言酬秦山人出山見呈

手攜酒榼共書幃迴語長松我即歸若是出山機已息  
嶺雲何事背君飛

七言酬秦山人見尋

左右香童不識君擔簦訪我領鷗群山僧待客無俗物  
唯有窓前片碧雲

七言宿法華寺簡靈澈上人

至道無機但杳冥孤燈寒竹自青熒不知何處小乘客  
一夜風來聞誦經

杼山集卷一

欽定四庫全書

杼山集卷二

唐 釋皎然 撰

五言奉酬袁使君高春遊鵲鵲峰蘭若見懷

鵲鵲中峰近高奇古人遺常欲乞此地養松挂藤絲昨  
聞雙旌出一川花滿時恨無翔雲步遠赴關山期躋險  
與誰賞折芳應自怡遙知忘歸趣喜得春景遲已見郢  
人唱新題石門詩

五言答裴濟從事

金  
卷二  
遲遲雲鶴意奮翅知有期三秉綱紀局累登清白資應  
懷青塘居蕙草沒前墀舊月照秋水廢田留故陂至今  
高風在為君吹桂枝昨逢洞庭客果得故人詩何異王  
內史來招道林師欲攜山侶出難與白雲辭

五言白雲上精舍尋杼山禪師兼示崔子向何山  
道上人

望遠涉寒水懷人在幽境為高皎皎姿及愛蒼蒼嶺果  
見栖禪子潺湲灌真頂積疑一念破澄息萬緣靜世事



花上塵惠心空中境清閑誘我性遂使腸慮屏許共林  
客遊欲從山王請木栖無名樹水汲忘機井持此一日  
高未肯謝箕穎夕霽山態好空月生俄頃識妙聆細泉  
悟深滌清茗此心誰得失笑向西林永

五言酬薛員外誼苦熱行見寄

六月金數伏茲辰日在庚炎曦爍肌膚毒霧昏性情安  
得奮輕翮超遙出雲征不知天地心如何匠生成火德  
燒百卉瑤草不及榮省客當此時忽貽懷中瓊捧翫煩

袂滌嘯歌美風生遲君佐元氣調使四序平中令霜不  
被大餘氣常貞江南詩騷客休吟苦熱行

五言採實心竹杖寄贈李萼侍御

竹杖裁碧鮮步林賞高直實心去內矯全節無外飾行  
樂聊自持扶危資爾力初生在榛莽孤秀豈封殖千雪  
不死枝贈君期君識

五言酬薛員外誼見戲一首

方知正始作麗掩碧雲詩文彩盈懷袖風規發詠思遺

弓逢大敵摩壘怯偏師頻有移書讓多慙繫組遲殘才  
迂且拙虛譽喜還疑猶倚披沙鑒長歌向子期

五言奉酬李中丞洪湖州西亭即事見寄兼呈吳  
馮處士時中丞量移湖州長史

愛君溪上住遲月開前局山火照書卷野風吹酒餅為  
誰留此物意在眼中清樵子逗煙墅漁翁宿沙汀主人  
非楚客莫謾譏獨醒宿昔邢城功道高心已冥貪將到  
處士放醉烏家亭

五言茗溪草堂自大厯三年夏新營泊秋及春彌  
覺境勝因紀其事簡潘丞述湯評事衡四十三

韻

萬慮皆可遺愛山情不易自從東溪住始與人群隔應  
物非宿心遺身是吾策先民崆峒子淪景事金液綺里  
猶近名於陵未泯跡吾師逆流教禪隱殊古昔

僧傳云  
人皆隱

於山我獨  
隱於禪

洗足臨潺湲銷聲寄松栢緗荷採堪服柔草

持可席道心制野猿法語授幽客境淨萬象真寄目皆

有益原上無情花

聖教意草木等器世間雖無情而理通又云爵爵黃花無非般若若是其義

山中聽經石

高僧詮公詩曰學徒數愧石生公有通經石

竹生自蕭散雲性

常潔白却見羈世人遠高摩霄翮達賢觀此意煩想遂

冰蘖伊子戰苦勝覽境情不溺智以動念昏功繇無心

積形骸爾何有生死誰忻戚為與勝悟冥不憂顏齡迫

春風自駘蕩禪地常閒寂擲札成柳枝

僧傳北遠法師涅槃經疏畢擲

札於庭柳枝生焉

溉瓶養泉脈道人知止足盥漱聊自適學外

見古賢頗令我心惕眇綿雲官世夢幻羽陵籍鬼錄徒

相矜九原誰家宅俗情封淺近至理昧堯跖蹈善嗟沉

冥履仁傷堙阨匠心聖亦尤攻異天見責

世論謂堯聖德而嗣不肖

盜跖毀行而享長富無福仁禍淫之應師心攻異之士反怨天責聖不知有昭昭之業論空者人失信空之實

試以慧眼觀斯言諒可覩外事非吾道忘緣倦所歷中

宵廢耳目形靜神不役色天夜清迴花漏時滴瀝

高僧要公

刻蓮花漏東風吹杉梧幽月到石壁此中一悟心可與十載

敵故交徒好我筐中無咫尺潘生入空門祖師傳秘蹟

潘生曾受曹溪禪門

湯子自天德精詣功不僻放世與成名兩圖

在所擇

遠公謂劉處士云世間唯是想耳苟放有世之見心即道豈有世外物來羈爾耶

吾高

鵲夷子身退無瑕摘吾嘉魯仲連功成棄珪璧二賢兼

彼才晚節何感激不然作山計改服我下澤君隳元亮

冠我脫潛師屐

僧傳沙門法潛著山屐入朝

倚臥高松根共逃金閨

籍

五言答裴集陽伯明二賢各垂贈二十韻今以一

章用酬兩作

知音如瓊枝天生為予有攀折若無階何殊天上柳裴

生清通嗣陽子盛德後詩名比元長

二子詩比王融賦為俱少年著名

體凌延壽

賦如文孝亦俱盛年

珠生驪龍頷或生靈蛇口何似雙

瓊章英英曜吾手白日不可汗清源肯容垢持此山上

心待君忘情友且伴邱壑賞未隨名宦誘坐石代瓊茵

製荷損艾綬清霄集我寺烹茗開禪牖發論教可垂正

文言不朽白雲供詩用清吹生座右不嫌逸今醉莫試

仙壺酒皎皎尋陽隱千年可為偶一從漢道卒世事無

紛紜星文齊七政天軸明二斗召士揚弓旌知君在林



數莫學潁陽子請師高山叟出處藩我君還來會厓阜  
五言荅豆盧居士春夜遊東園見懷

春意賞不足承夕步東園事表精慮遠月中華木繁開  
襟寄清景遐想屬空門安得纚芳屐看君幽徑萱

五言寄崔萬芳夏

氣殺高隼擊惜芳步寒林風搖蒼琅根霜剪莢

音翹蓮心

歸思忽眇眇佳期亦沉沉我身豈遐遠如隔湘漢深事  
邇智莫及願乖情不任遲君忘言侶一笑開吾襟

五言訪朱放山人

野人未相識何處異鄉隔作逢雲陽信教向雲陽覓空  
聞天上風飄飄不可覲應非矍鑠翁或是滄浪客早晚  
從我遊共攜春山策

五言晚冬廢溪東寺懷季同直縱

廢溪無人跡益見離思深歸來始昨日恍惚驚歲陰清  
想屬遙夜圓景當空林宿昔月未改何如故人心遊從  
間芳趾搖落棲寒岑眇眇湖上別含情初至今道流安

寂寞世路倦嶮嶽此意欲誰見懷賢獨難任徽聲反冥  
默夕籟何哀吟禪念破離夢吾師誠援琴耿耿已及旦  
曷繇開此襟幽期諒未偶勝境徒自尋安得西歸雲因  
之傳素音

五言兵後與故人別予西上至今在楊楚因有是  
寄

日月不相待思君魂屢驚草玄寄楊子作賦得蕪城溫  
溫獨游跡遙遙相望情淮上春草歇楚子秋風生辟士

天下盡君何獨屏營運開應佐世業就可成名誰借楚  
山佳年年事耦耕

五言因遊支硎寺寄邢端公

大厦資多士掄材得豫章清門推問望早歲騁康莊作  
用方開物聲名久擅場丹延分塞郡宿昔領戎行始馭  
屏星乘旋陰蔽弗崇

始佐延州  
俄典茲郡

朝端瞻鶚立關右仰鷹

揚威令魚寧朔英聲重護羌三軍成父子雜虜避封疆  
身執金吾貴時遭寶運昌雍容持漢稍肅穆衛周堂排

難知臣節攻疑定國章一言明大義千載揖休光踐職

勲庸列修躬志行彰優游應慕陸止足定師張中展懷

殊政南州佇小康仁為桂江雨威是栢臺霜

自桂州除  
侍御史

謬言無隱公忠禍不防譴深辭紫禁恩在副朱方

左遷

溫州治中量  
移潤州長史

切玉鋒休淬垂天翅罷翔論文徵賈馬述

隱許求羊肘後看金碧腰間笑水蒼詩題白羽扇酒挈

綠油囊曠達機何有深沉器莫量時應登古寺佳趣在

春崗止水平香砌鮮雲滿石床山情何寂樂塵世自飛

揚已遇鑪峰社還思緝蕙房外心親地主內學事空王  
花會宜春淺禪遊喜夜涼高明依月境蕭散躡庭芳得  
道殊秦佚隳名似楚狂餘生於此足不欲返韶陽

五言同諸公奉侍祭岳瀆使大理盧幼平自會稽

迴經平望將赴于朝廷期過故林不至

用題中韻

望祀崇周典皇華出漢庭紫泥傾會計玄酒薦芳馨聖  
慮多虔肅齋心合至靈占祥刊史竹筮日數堯奠禮秩  
加新命朝章篤理刑敷誠通北闕遺愛在南亭苔水思

曾泛磯山憶重經清風門客仰佳頌國人聽攀桂留卿  
月徵文待使星春郊廻駟牡遙識故林青

五言早秋桐廬思歸示道諺上人

桐江秋信早憶在故山時靜夜風鳴磬無人竹掃墀猿  
來觸淨水鳥下啄寒梨可即關吾事歸心自有期

五言勞勞山居寄呈吳處士

山事繇來別只應中老身寒園掃綻栗秋浪拾乾薪

楚人

呼養柴為秋浪領鶴閑書竹誇雲笑向人俗家相去遠野水作

東隣

五言寄報德寺從上人

鼓吹山  
在寺西

宗流許身子物表養高閑  
空色清涼寺秋聲鼓吹山  
看心水磬後行道雨花間  
七葉翻章句時時啟義關

五言山中月夜寄無錫長官

湖上涼風早雙峰月色秋  
遙知秣陵令今夜在西樓  
別葉蕭蕭下含霜處處流  
如何共清景異縣不同遊

五言奉賀顏使君真卿二十八郎絕自河北遠歸



相失值氛煙纔應掌上年久離驚貌長多難喜身全比  
信尚書重如威太守憐滿庭看玉樹更有一枝連

五言題湖上蘭若示清會上人

峰心惠忍寺嶮頂謝公山何似南湖近芳洲一畝間意  
中雲木秀事外水堂閑永日無人到時看獨鶴還

五言秋宵書事寄吳馮

真性在方丈寂寥無四隣秋天月色正清夜道心真大  
夢觀前事浮名悟此身不知庭樹意榮落感何人

五言題山壁示道維上人

獨居何意足山色在前門身野長無事心冥自不言閑  
行數亂竹靜坐照清源物外從知少禪徒不耐煩

五言晚秋登佛川南峰懷裴例

登嶺望落日眇然傷別魂亭臯秋色遍遊子在荆門世  
故東西客山空斷續猿此心誰復見寂寞偶芳蓀

五言訪陸處士羽

太湖東西路吳主古山前所思不可見歸鴻自翩翩何

山賞春茗何處弄春泉莫是滄浪子悠悠一釣船

五言酬李侍御萼題看心道場賦以眉毛腸心牙

等五字

畫得牙字

我法從誰悟心師是貫花三塵觀種子一雨發萌芽定

起輪燈缺宵分印月斜了空如藏史始肯會禪家

辯正論亦

有九流一曰

禪家者流

五言酬姚補闕南仲雲溪館中戲題隨書見寄

寺溪臨使府風景借仁祠補袞周官貴能名漢主思臥

雲知獨處望月憶同時忽枉絨中贈瓊瑤滿手持

五言春夜期裴都曹濟集心上人院不至

東林期隱吏日月為虛盈遠望浮雲隔空憐定水清  
道遙方外侶往苒府中情漸聽寒輶發淵淵在郡城

五言和裴少府懷京兄弟

宦遊三楚外家在五陵原涼夜多歸夢秋風滿故園  
北書無遠信西候獨傷魂空念青門別殷勤岐路言

五言和閻士和望池月荅人

片月忽臨池雙蛾憶畫時光浮空似粉影散不成眉孤  
枕應驚夢寒林正入帷情知兩處望莫怨獨相思

五言遥和塵外人與陸澧夜集山寺問涅槃義

魚賞陸生文卷

上人自號北山子

共是竹林賢

孫綽僧史以七人配德嵇阮號竹林七賢

心從貝葉傳說經看

月喻開卷愛珠連清淨遥城外蕭疎古塔前應隨北山

子高頂枕雲眠

五言春日  
和盧使君幼平開元寺聽妙奘上人講

時上人將  
遊五臺

仁聖垂文在虛空日月懸陵遲遲哲匠宗旨發幽詮法  
受諸侯請心教四子傳春生雪山草香下棘林天顧我  
從今日聞經悟宿緣涼山萬里去應為教猶偏

七言答李侍御問

入道曾經離亂前長千古寺住多年愛貧唯製蓮花足  
取性閑書樹葉篇自笑不歸看石牒誰高無事弄名泉  
身外空名何足問吾心已出第三禪

七言奉酬李員外使君嘉祐蘇臺屏營居春首有

懷

昔歲為邦初未識今朝休沐始相親  
移家水巷貪依靜種柳風窓欲占春  
詩思先邀烏府客山情還訪白樓人  
登臨許作煙霞伴高在方袍間幅巾

七言和李舍人使君紆題雲明府道室

許令如今道性雲曾經西岳事桐君  
流霞手把應憐壽黃鶴心期擬作群  
金籙時教弟子檢砂牀不遣世人聞

桂陽亦是神仙守分別無嗟兩地分

七言奉和陸中丞使君長源寒食日作

寒食江天氣最清庾公晨望動高情因逢內火千家靜  
便覩行春萬木榮深淺山容飛雨細縈紆水態拂雲輕  
腰章本郡誰相似數日臨人政已成

五言奉酬袁使君送陸灞却廻期過寺院

欲別湖上客暮期西林還高歌風音表放舟月色間更  
人莫報夜禪閣本無關



五言招韓武康章

山僧雖不飲  
酤酒引陶潛  
此意無人別  
多為俗士嫌  
五言秋居法華寺下院望高頂贈如獻上人

峰色秋天見  
松聲靜夜聞  
影孤長不出  
行道在寒雲

五言贈韋早陸羽

只將陶與謝  
終日可忘情  
不欲多相識  
逢人懶道名

五言戲呈薛彝

山僧不厭野  
才子會須狂  
何處銷君興  
春風擺綠楊

五言贈顏主簿

漢家儀禮盛名教出諸顏更見尚書後能文在子山

五言贈融上人

常愛西林寺池中月出時芭蕉一片葉書取寄吾師

五言聽寒更寄朱兵曹巨川

欹枕聽寒更寒更發還住一夜千萬聲幾聲到君處

五言早春書懷寄李少府仲宣

并序

予故里在長城卞山簪歲屬狂寇陷沒江左親故離散

永望粉梓不覺傷懷因李使君長城遂寄是詩以見情也

早年初問法因悟目中花忽值胡雛起芟夷若亂麻脫身投彼岸弔影念生涯跡與空門合心將世路賒東田已蕪沒

東郢公有東田詩

南澗益傷嗟

林陵記曰南澗竭謝氏滅

崇替驚人

事凋殘感物華知君過我里惆悵舊煙霞

### 七言贈和評事判官

廷評年少法家流心似澄江月正秋學究天人知遠識

權分鹽鐵許良籌春風憶酒烏家近好月論禪謝寺幽  
清白比來誰見賞憐君獨有富人侯

七言酬秦系山人題贈

雲林出空鳥未歸松吹時飄雨浴衣石語花愁徒自苦  
吾心見境盡為非

七言酬秦系山人戲贈

正論禪寂忽狂歌莫是塵心顛倒多白足行花曾不染  
黃囊貯酒欲如何

七言貽李湯

茅氏常論七真記壺公愛說三山事寧知梅福在人間  
獨為蒼生作仙吏日服丹砂骨自清膚如冰雪心更明  
山中玉筍是仙藥袖裏素書題養生願隨黃鶴一輕舉  
仰望青霄獨延佇平生好駿君已知何必山陰訪王許  
七言述祖德贈湖上諸沈

我祖文章有盛名千年海內重嘉聲雪飛梁苑操奇賦  
梁苑出惠連公雪賦春發池塘得佳句  
康樂云池上樓詩夢惠連  
方得池塘生芳草之句

世業相承及我身風流自謂過時人初看甲乙矜言語

對客偏能鳴鶴舞

尚公少  
年善焉

飽用黃金無所求長裾曳地

干王侯一朝金盡長裾裂吾道不行計亦拙歲晚高歌

悲苦寒空堂危坐百憂攢昔時軒蓋金陵下何處不傳

沈與謝

田公與約俱  
是西邸八支

綿綿芳藉至今聞眷眷通宗有數

君誰見予心獨飄泊依山寄水似浮雲

七言舟行懷閭士和

二月湖南春草遍橫山渡口花如霰相思一日在孤舟

空見歸雲兩三片

七言贈張道士

玉京真子名太一因服日華心如日此心不許世人知  
只向仙宮未曾出

七言戲呈吳馮

世人不知心是道只言道在他方妙還如瞽老望長安  
長安在西向東笑

雜言宿山寺寄季中丞洪

偶來中峰宿閑坐見真境寂寂孤月心亭亭圓泉影

闕

滿山花落始知靜從他半夜愁猿驚不廢此心長

杳冥

雜言戲贈吳馮

予讀古人書遂識古人面不是識古人邪正心自見貴  
義輕財求俗譽一錢與人便驕倨昨朝為火今為水此  
道非君獨撫膺

五言感興贈烏程李明府伯宜兼簡諸秀才



門前峴山近無路可登陟徒愛峴山高仰之常歎息不  
如松與桂生在重巖側

五言晚秋宿李軍道所居

清溪路不遙都尉每相招落日休戎馬秋風罷射鵬木  
花生野徑栢實滿寒條永夜依山府禪心共寂寥

杼山集卷二

欽定四庫全書

杼山集卷三

唐 釋皎然 撰

五言奉和顏使君真卿與陸處士羽登妙喜寺三  
癸亭亭即陸生所創

秋意西山多列岑  
縈左次繕亭歷三  
癸疏趾隣什寺元  
化隱靈蹤始君啓  
高誅誅榛養翹楚  
鞭草理芳蕙俯砌  
披水容逼天掃峰  
翠境新耳目換物  
遠風煙異倚石忘  
世情援雲得真意  
嘉林幸勿剪禪侶  
欣可庇衛法大臣

過佐遊群英萃龍池護清澈虎節到深邃徒想嶮頂期  
于今沒遺記

五言奉陪陸使君長源裴端公樞春遊東西武邱

寺

雲水夾雙刹遙疑涌平陂入門見藏山元化何繇窺  
組探詭怪停驄訪幽奇情高氣為爽德暖春亦隨瑤草  
自的礫蕙樓爭蔽虧金精落壞陵劍彩沉古池一覽而  
天界中峰步未移應嘉生公石列坐援松枝

五言奉和陸使君長源夏月遊太湖

此時公權領湖州

庾公心曠遠府事局耳目遂與南湖遊虛襟滌煩燠始

知皇天意積水在亭育細流信不讓動物欣所蓄萬頃

合天容洗然無雲族峭嶠矚仙嶺

神仙傳洞庭神仙所居也

超遙隨

明牧知公愛澄清波靜氣亦肅已見橫流極況聞長鯨

戮

會北信至王師已收長安

中洲暫採蘋

即柳惲汀洲採蘋之意也

南郡思剗

竹

公時改授信州

向夕分好風飄然送歸舳

五言奉和崔中丞使君論李侍御登爛柯山宿石

橋寺効小謝體

常愛謝公郡幽期願相從果廻青驄臆共躡玄仙蹤靈  
境若髣髴爛柯思再逢飛梁丹霞接古局蒼苔封往想  
冥昧理誰親冰雪容蕙樓聳空界蓮宇開中峰

今為仙  
寺晉是

仙山遺局古橋  
昇仙之處見在昔化冲虛鶴今藏護法龍雲窺香樹杳  
月見色天重永夜寄岑寂清言滌心胸盛遊十年後書  
在巖中松

五言同顏使君真卿李侍御夢遊法華寺登鳳翅

山望太湖

雙峰開鳳翅秀出南湖州地勢抱郊樹山威增郡樓正  
逢周柱史來會魯諸侯緩步凌彩清鏡發颼颼披雲  
得靈境拂石臨芳洲積翠遙空碧含風廣澤秋蕭辰資  
麗思高論驚精修何似鍾山集徵文及惠休

五言奉陪陸使君長源諸公遊支硎寺

寺即支公  
學道處

嘗覽高逸傳山僧有遺蹤佐遊繼雅篇嘉會何繇逢塵  
世即下界色天當上峰春暉遍衆草寒色留高松繚繞

彩雲合參差綺樓重瓊葩灑巾舄石潄清心胸靈境若  
可託道情知所從

五言奉陪鄭使君諤遊太湖至洞庭山登上真觀  
却望湖水

郡齋得無事放舟下南湖湖中見仙郎果與心賞俱不  
遠風物變忽如寰宇殊背雲視層岨別是登蓬壺突兀  
盤水府參差杳天衢迴瞻平蕪盡洪流豁中區氣吞江  
山勢色淨氛靄無靈長習水德勝勢當地樞朝宗動歸



心萬里思鴻途

五言奉和袁使君高郡中新亭會張鍊師晝會二

上人

置亭隱城堞事簡跡易幽公性崇儉素雅才非廣求傍  
簷竹雨清拂案杉風秋不移府中步登茲如遠遊坐覺  
詩思高俯知物役休虛寂偶禪子逍遙親道流更聞臨  
川作下節安能訓

五言奉和陸使君長源水堂納涼効曹劉體

柳家陶暑亭意遠不可齊煩襟蕩朱絃高步援綠萐愛  
公滿亭客來是清風攜澄渟前溪上曠望古郡西六月  
正中伏水軒氣常淒野香襲荷芰道性親鳬鷺禪子顧  
惠休逸民重劉黎乃知高世量不以出處睽

五言夏日奉陪陸使君長源公堂集

府中自清遠六月高梧間寥亮泛雅瑟逍遙扣玄關  
雲與人靜庭鶴隨公閑動息諒兼遂茲情即東山

五言伏日就湯評事衡湖上避暑

大火方燥石停雲晝亦收將從賞心侶寸景難遠遊擁  
几苦炎伏出門望汀洲迴溪照軒宇廣陌臨梧楸釋悶  
命雅瑟放情思亂流更持無生論可以清煩憂

五言奉和顏使君真卿修韻海畢會諸文生東堂  
重校

外學宗碩儒游焉從後進恃以仁恕廣不學門欄峻著  
書裨理化奉上表誠信探討始河圖紛綸歸海韻親承  
大匠琢况覩頽波振錯簡記鈎槩音裁閱書移玉鎮昌繇

旌不朽盛美流歌引

五言喜義興權明府自君山至集陸處士羽青塘

別業

應難久辭秩暫寄君陽隱已見縣名花會逢闌是粉本  
自尋人至寧因看竹引身關白雲多門占春山盡最賞  
無事心籬邊釣溪近

五言夏日集李司直縱溪齋

修景屬良會遠颺生煩襟泄雲收淨綠衆木積芳陰疏

滌府中務迢遙湖上心習閑得招我賞夜宜泛琴山近  
資性靜月來寄情深澹然若事外豈藉隳華簪

五言夏日題桐廬楊明府納涼山齋

陶家無炎暑自有林中峰席上落山影桐梢迴水容放  
懷涼風至緩步清陰重何事親堆堆按猶多高世蹤

五言和楊明府早秋遊法華寺

釋事出縣閣初聞茲山靈寺扉隱天色影剎遙丁丁碧  
峰委合沓香蔓垂萱苓清景為公有放曠雲邊亭秋賞

石潭潔夜嘉杉月清誦空性不昧助道跡又經是以於  
物理紛然若未形移來字人要全與此道冥

五言宿道士觀

古觀秋木秀冷然屬鮮飈瓊花被修蔓栢實滿寒條影  
殿山寂寂寥天月昭昭幽期寄仙侶習定至中宵清佩  
聞虛步真官方宿朝

五言冬日天井西峰張鍊師所居

採薪逢野泉漸見栖閑所坎坎山上聲幽幽林中語仙

卿何代隱鄉服言亦楚開水淨藥苗掃雪候山侶零葉  
聚敗籬幽花積寒渚冥冥孤鶴性天外思輕舉

五言奉同顏使君真卿開元寺經藏院會觀樹文  
殊碑

萬國布殊私千年降祖師鴈門傳法至龍藏立言時故  
實刊周典新聲播魯詩六銖那更拂劫石盡無期

五言奉同盧使君幼平遊精舍寺

影剎西方在虛空翠色分人天霽後見猿鳥定中聞真

界隱青壁春山凌白雲今朝石門會千古仰斯文

五言奉同顏使君真卿袁侍御駱駝橋翫月

山中常見月不及共遊時水上恐將缺林端愛落遲鳥  
驚憲府客人詠鮑家詩永夜南橋望徘徊若有期

五言和邢端公登臺春望句句有春字之什

春日繡衣輕春臺別有情春煙間草色春鳥隔花聲春  
樹亂無次春山遙得名春風正飄蕩春甕莫須傾

五言經仙人渚即沈山下古人沈義白日昇天處



日月人間短何時此得仙古山春已盡遺渚事空傳不見騰雲駕徒臨洗藥泉如今成逝水翻使恨流年

五言獨遊二首

性野趣無端春晴路又乾逢泉破石弄放鶴向雲看好  
僻誰相似從狂我自安芳洲亦有意步上白沙灘

又

臨水興不盡虛舟可同嬉還雲與歸鳥若共山僧期世  
事吾不預此心誰得知西峰有禪老應見獨遊時

五言遊溪待月

溪色思泛月沿洄欲未歸殘燈逢水店踈磬憶山扉夜  
浦魚驚少空林鵲遠稀可中纔望見撩亂擣寒衣

五言西溪獨泛

道情何所寄素舸漫流間真口憐高鶴無名羨野山經  
寒叢竹秀入靜片雲閒泛泛誰為侶唯應共月還

五言早秋陪韓明府泛阮元公溪

公嘗言禪功可入而官情詎能

忘故詩中有  
此意戲之

雨信清殘暑蕭條古縣西  
早涼生浦淑秋意滿高低  
前事雖堆案閒情得沂溪  
何言戰未勝空寂用還齊

五言九日陪顏使君真卿登水樓

重陽荆楚尚高會  
此難陪偶見登龍客  
同遊戲馬臺  
風文向水疊  
雲態擁歌廻  
持菊煩相問  
捫襟愧不才

五言與盧孟明別後宿南湖對月

五湖生夜月千里滿  
寒流曠望煙霞盡  
淒涼天地秋  
相思路渺渺  
獨夢水悠悠  
何處空江上  
徘徊送客舟

五言自義亭驛送李長史縱夜泊臨平東湖

長亭賓馭散岐路起悲風  
千里勤王事驅車明月中  
寒生洞庭水夜度塞門鴻  
處處堪傷別歸來山又空

五言出遊

少時不見山便覺無奇趣  
狂發從亂歌情來任閒步  
此心誰共證笑看風吹樹

五言界石守風望天竺靈隱二寺

山頂東西寺江中旦暮潮  
歸心不可到松路在青霄

五言奉和顏使君真卿修韻海畢州中重宴

世學高南郡身封盛魯邦  
九流宗韻海七字揖文江  
借賞雲歸堞留歡月在窓  
不知名教樂千載與誰雙

五言晦日陪顏使君白蘋洲集

南朝分古郡山水似湘東  
堤月吳風在蒲裾楚客同  
桂寒初結旆蘋小欲成叢  
時晦佳游促高歌聽不終

五言冬至日陪裴端公使君清水堂集

亞歲崇佳宴華軒照淥波  
渚芳迎氣早山翠向晴多  
推

往知時訓書祥辨政和從公惜日短留賞夜如何

五言陪盧判官水堂夜宴

暑氣當宵盡徘徊坐月前靜依山堞近涼入水扉偏  
久是樓林客初逢佐幕賢愛君高野意烹茗釣淪漣

五言新秋同盧侍御薛員外白蘋洲月夜

隔暑蘋洲近迎涼欲泛舟榮從憲府至喜會夕郎遊  
氣奪滄浪色風欺汗漫流誰言三伏夜獨此月前秋

五言夏日集裴錄事北亭避暑

前林夏雨歇為我生涼風一室煩暑外衆山清景中忘  
歸親野水適性許雲鴻蕭散都曹吏還將靜者同

五言與王錄事會張徵君姊妹鍊師院翫雪兼懷  
清會上人

何意廉從事還來會默仙寒空驚雪遍春意入歌偏瑤  
草三花發瓊林七葉連飄飄過柳寺應滿譯經前

五言和李侍御萼歲初夜集處士書閣

書閣即侍  
御所創

遲賢新置閣高意此郊居古逕行春早新窓見月初放

歌還倚瑟講道亦觀書為我留禪位來逢此會疎

五言湯評事衡水亭會覺禪師

山侶相逢少清晨會水亭雪晴松葉翠煙暖藥苗青靜  
對滄洲鶴閑看古寺經應憐叩關子了義共心冥

五言與朝陽山人張朝夜集湖亭賦得各言其志

洞庭孤月在秋色望無邊零露積衰草寒蟬鳴古田茫  
茫區中想寂寂塵外緣從此悟浮世胡為傷暮年

五言晦夜李侍御萼宅集招潘述湯衡海上人飲



茶賦

晦夜不生月琴軒猶為開牆東隱者在淇上逸僧來茗  
愛傳花飲詩看卷素裁風流高比會曉景屢徘徊

五言寄昱上人上方居

厭向人間住逢山欲懶歸片雲閑似我日日在禪扉地  
靜松陰遍門空鳥語稀夜涼踈磬盡師友自相依

五言夏日與綦母居士昱上人納涼

為依爐峰住境勝增道情涼日暑不變空門風自清坐

援香實近轉愛綠蕪生宗炳青霞士如何知我名

五言建元寺集皇甫侍御書閣

不因居佛里無事得相逢名重朝端望身高俗外蹤

公愛

講佛經嘗云暮劉處士深詣至理

機閑看淨水境寂聽疎鐘宣室恩長

在知君志未從

五言郭北尋徐主簿別業

近依城北住幽遠少人知積雪行深巷閑雲繞古籬竹

花冬更發橙實晚仍垂還共巖中鶴今朝下淥池

五言題報恩寺清幽上人西峰

寺即陳文帝故鄉

陳世凋亡後仁祠識舊山  
帝鄉喬木在空見白雲還  
雙塔寒林外三陵暮雨間  
此中難戰勝君獨啟禪關

五言題鄭谷江畔桐齋

鄭生好琴性達兼寡欲

客齋開別住坐占綠江濱  
流水非外物閑雲長屬君  
浮榮未可累曠達若為群  
風起高梧下清絃日日聞

五言和閻士和李蕙冬夜重集

郡理日閑曠洗心宿香峰  
雙林秋見月萬壑靜聞鐘  
珮

玉行山翠交麾動水容如何股肱守塵外得相從

五言春日陪顏使君真卿皇甫曾西亭重會韻海

諸生

為重南臺客朝朝會魯儒暄風衆木變清景片雲無峰  
翠飄簷下溪光照座隅不將簪艾隔知與道情俱

五言寒食日同陸士行報德寺宿解公房

古寺章陵下潛公住幾年安心生輭草灌頂引春泉寂  
寂傳燈地寥寥禁火天世間多暗室白日為誰懸

五言兵馬曹季良宅夜集

清景不可失，尋君趣有餘。  
身髙避事後，道長問心初。  
出處名則異，遊從跡何疎。  
吟看刻盡燭，笑卷讀殘書。  
露彩生筆硯，風音入庭除。  
平明仙侶散，轂𨮒動廻車。

五言同李侍御萼李判官集陸處士羽新宅

素風千戶敵，新語陸生能。  
借宅心常遠，移籬力更弘。  
釣絲初種竹，衣帶近裁藤。  
我佐推兄弟，詩流得友朋。  
柳陰容過客，花選許招僧。  
不為墻東隱，人家到未曾。

五言題報恩寺惟照上人房

上界雨色乾涼宮日遲遲水文披菡萏山翠動罽毼中  
有清真子惛惛步閑墀手縈頗黎縷願證黃金姿旋草

堦下生看心當此時

亦名苾芻草枝葉皆右  
旋故名旋草草有五德

七言尋天目徐君

常見仙翁變姓名豈知松子號初平逢人不道往來處  
賣藥還將鷄犬行獨鶴天邊俱得性浮雲世上共無情  
三花落地君猶在笑撫安期昨日生

七言同李著作縱題塵外上人院

百緣唯有什公瓶萬法但看一字經從遣鳥喧心不動  
任教香醉境常冥蓮花天晝浮雲卷貝葉宮春好月停  
禪伴欲邀何著作空音宜向夜中聽

七言題周諫別業

予寺與周生  
所俱臨茗水

隱身苔上欲如何不著青袍愛綠蘿柳巷任疎容馬入  
水籬從破許船過昂藏獨鶴閑心遠寂歷秋花野意多  
若訪禪齋遙可見竹窓書幌共煙波

七言同李中丞洪水亭夜集

佳人但莫吹參差正憐月色生酒卮山公取醉不關我  
為愛樽前白鷺鷥

七言題秦系上人入麗句亭

獨將詩教領諸生但看青山不愛名滿院竹聲堪愈疾  
亂牀花片足忘情

七言春夜集陸處士翫月

欲賞芳菲肯待辰忘情人訪有情人西林可是無清景



祇為忘情不記春

七言寄題雲門寺梵月無側房

時人相傳是寶月道人後身也

越山千萬雲門絕西僧貌古還名月清朝掃石行道歸  
林下眠禪看松雪

七言法華寺上方題江上人禪室

路入松聲遠更奇山光水色共參差中峰禪寂一僧在  
坐對梁朝老桂枝

五言冬日山行過薛徵君

我行倦修坂四顧無平陸雨霽鳴鷹鷃天寒聚麋鹿幽  
人訪名士家在南崗曲菜實繁小園稻花遶山屋深居  
寡憂悔勝境怡耳目徵心尚與我永言謝浮俗

雜言往丹陽尋陸處士不遇

遠客殊未歸我來幾惆悵叩關一日不見人繞屋寒花  
笑相向寒花寂寂遍荒阡柳色蕭蕭愁暮蟬行人無數  
不相識獨立雲陽古驛邊鳳翅山中思本寺魚口村口  
望歸船歸船不見見寒煙離心遠水共悠然他日相期

那可定閑僧著處卽經年

五言集湯評事衡湖上望微雨

蒼涼遠景中雨色綠山有雲送滿洞庭風吹繞楊柳蕭蕭解輕袂盡日隨林叟

五言九日與陸處士羽飲茶

九日山僧院東籬菊也黃俗人多泛酒誰解助茶香


七言夜過康錄事造會兄弟

愛君門館夜來清瓊樹雙枝是弟兄月在詩家偏足思

風過客位更多情

五言題沈少府書齋

不下南昌書齋每日閑  
野花當砌落溪鳥逐人還  
有興常臨水無時不見山  
千峰數可盡不出小窓間



杼山集卷三

欽定四庫全書

集部

杼山集卷

四至六

詳校官太常寺少卿臣陳桂林

檢討臣何思鈞覆勘

覆校官中書臣呂雲棟

校對官助教臣蔡鎮

謄錄舉人臣張仲芳

欽定四庫全書

村山集卷四

唐 釋皎然 撰

五言送梁拾遺肅歸朝

明主重文諫才臣出江東  
東書辭東山改服臨北風  
萬里望皇邑九重當曙空  
天開芙蓉闕日上蒲桃宮  
天子初未起金閨籍  
先通身逢軒轅世名貴  
鴛鴦中故人榮此別  
何用悲絲桐

奉陪楊使君頊送段校書赴南海幕

碩賢靜廣州信為天下貞屈茲大將佐籍彼延閣英聲  
動柳吳興郊餞意不輕吾知段夫子高論關蒼生處以  
德為藩出則道有行遙知南樓會新景當詩情天高林  
瘴洗秋遠海色清時泰罷飛檄唯應頌公成

五言送陸侍御士佳赴上京

長安三千里喜行不言永清路黃塵飛大河滄流靜更  
懷西川府主公昔和鼎伊鬱瑤瑟情威遲花驄影此時  
已難別日又無停景出餞闕相從心隨過前嶺

五言奉陪顏使君真卿登峴山送張侍御嚴歸堂  
峴首千里情北轅自茲發煙霞正登覽簪筆限趨謁黃  
鶴望天衢白雲歸帝闕客心南浦柳離思西樓月留賞  
景不延感時芳易歇他晨有山信一為訪林樾

五言酬元主簿子球別贈

故人方遠適訪我陳別情此夜偶禪室一言了無生覽  
君緘中寶如掌清玉瑛胡為蘊高價歲晚徒營營辭秩  
貧且病何人見艱貞出無黃金橐空歌白苧行威遲策



駑馬獨望故關樹渺渺千里心春風起中路近聞新拜  
命鸞鳳猶棲棘勸君寄一枝且養冥冥翼甘泉多竹花  
明年待君食

荅道素上人別

春色遍遠道寂寞閨中行碧水何渺渺白雲亦英英離  
人不可望日暮芳洲情黃鶴有逸翮翹首白雲傾欲為  
山中侶肯秘遼天聲藍縷真子褐歲蕤近臣纓以茲奪  
爾懷常恐道不成吾門弟子中不減惠休名一性研已

遠五言功更精從君汗漫遊莫廢學無生忍草肯搖落  
禪枝不枯榮采采慰長路知吾心不輕幻情有去住真  
性無離別留取老桂枝歸來共攀折

雪溪館送韓明府章辭滿歸

洛令從告還故人東門餞惠愛三年積軒車一夜遠曉  
月離館空秋風故山晚榮君有嘉薦顧我阻遊行宿昔  
峰頂心依依不可卷

送穆寂赴舉

天子錫玄纁傾山禮隱淪君拋青霞去榮資觀國賓劍  
光既陸離瓊彩何璘玢夙駕別情遠商絃秋意新冥冥  
鴻鵠姿數尺看蒼旻殘寇近宋郊西行惡飈塵立身素  
耿介處難思經綸春府搜才日高科得一人

送張燹歸長沙

早聞凌雲彩謂在鴛鴦儔華髮始相遇滄江仍旋遊策  
名忘苟進澹慮輕所求常服遠遊誠緬懷經世謀片帆  
背風渚萬里還湘洲別望荆雲積歸心漢水流蘭若行

采采桂棹思悠悠宿昔無機者為君動離憂

秋日毘陵南寺送潘述之揚州

孤客秋易傷嘶蟬靜仍續佳晨亦已屢歡會常不足禪  
地非路岐我心豈羈束情生遠別時坐恨清景促望中  
千里隔暮歸西山曲蕭條月中道彩雉原上綠不見同  
心人幽懷增躑躅

春日又送潘述之揚州

別渚望邗城岐路春日遍柔風吹楊柳芳景流郊甸日

日東林期今夕異鄉縣文房曠佳士禪室阻清盼潘生曾受  
印禪離恨奪賞心不得諧所願莫憶山中人碧雲遙可見

新秋送盧判官

故人念宿昔欲別增遠情入座炎氣屏為君秋景清  
繇來空山客不怨離絃聲唯有暮蟬起相思碧雲生

奉送袁高使君詔徵赴行在劾曹劉體

皇心亭毒廣蠶賊皆陶甄未刈蚩尤旗方同軒后年天  
子幸漢中輟轅阻氛煙璽書召募牧名在列岳仙國難

倚長城廟謀資大賢清損休汝騎仁留述職篇遐路渺  
天末繁笳思河邊飾徒促遠期祇命赴急宣諛才豈足  
稱深仁顧何偏那堪臨流意千里望旗旃

奉送陸中丞長源詔徵入朝

詔下鄮侯幕徵賢寵上勲才當持漢典道可致堯君藩  
牧今榮餞詩流此盛文水從吳渚別樹向楚門分宿寺  
期嘉月看山識故雲歸心復何奈悵悵在江濱

奉送中丞道昌入朝

文憲中司盛恩榮外鎮崇諸侯皆取則八使獨推功詔  
喜新銜鳳車看舊飾熊去思今武子餘教昔文翁清在  
如江水仁留是國風光徵二千石掃第望司空

冬日送顏延之明府撫州覲叔父

臨川千里別惆悵上津橋日暮人歸盡山空雪未消鄉  
雲心渺渺楚水路遙遙林下方歡會山中獨寂寥天寒  
驚斷鴈江信望迴朝歲晚流芳歇思君在此宵

五言送關小師還金陵

如何有歸思愛別欲忘難白鷺沙洲晚青龍水寺寒  
蕉花鋪淨地桂子落空壇持此心為境應堪月夜看

五言峴山送裴秀才赴舉

漢家招秀士峴上送君行萬里見秋色兩河傷遠情  
王師出西鎬敵寇避東平天府登名後廻看楚水清

五言酬別襄陽詩僧少微

詩中荅上人  
歸夢之意

證心何有夢示說夢歸頻文字齋秦本詩騷學楚人  
蘭開衣上色柳向手中春別後須相見浮雲是我身



五言送契上人遊揚州

西陵古江口，遠見東揚州。  
淶水不同泛，春山應獨遊。  
尋僧白巖寺，望月謝家樓。  
宿昔心期在，人寰非久留。

五言送德清衛明府赴選

柳默陟  
有薦狀

八使慎求能，東人獨薦君。  
身猶千里限，名已九霄聞。  
遠路翻喜別，離言暫惜分。  
鳳門多士會，擁珮入卿雲。

五言送鄭孝廉淮西覲省

離袂翠華滿，晨羞欲早行。  
春風生楚樹，曉角發隋城。  
野

靄濕衣綠江鴻增客情征途不用戒坐見白波清

五言送沈秀之閩中

越客不成歌春風起淥波嶺重寒不到海近瘴偏多野  
戍枕榔發人家翡翠過翻疑此中好君問定如何

五言送清會上人遊京

佳遊限衰疾一笑向西風思見清門外曾臨素滙東峰

明雲際寺

寺名

日出露寒宮

宮名

行道禪長在香塵不染空

五言送沈居士還太原

辭官因世難家族盛南朝名重郊居賦

沈休文作郊居賦

才高

獨酌謠

沈文之作

浪花飄一葉峰色向三條高逸雖成性弓

旌肯忘招

奉同顏使君真卿峴山送李法曹陽冰西上獻書

時會有詔徵赴京

漢日中郎妙周王太史才雲書捧日去鶴版下天來草  
見吳洲發花思御苑開羊公惜風景欲別幾遲迴

五言兵後送姚太祝赴選

兩河兵已偃處處見歸舟日夜故人散江皋芳樹秋楚  
雲傷遠思秦月憶佳遊名動春官籍翩翩才少儔

五言兵後送薛居士移家安吉

舊遊經喪亂道在復何人寒草心易折閑雲性常真交  
情別後見詩句比來新向我桃州住惜君東嶺春

五言送鄔僂之洪州覲兄弟

年少足詩情西江楚月清書囊山翠濕琴匣雪花輕久  
別經離亂新正憶弟兄贈君題樂府為是豫章行

五言送乾封李成

羽檄飛未息離情遠近同  
感君繇泛瑟關我是征鴻  
眇默歸人盡疎蕪夜渡空  
還期當歲晚獨在路行中

五言送崔判官還揚子

輕傳祇遠役依依下姑亭  
秋聲滿楊柳暮色繞郊垌  
煙水搖歸思山當楚驛青

奉酬袁使君西樓餞秦山人與書同赴李侍御招

三韻

秋風怨別情江守上西城行署寒流淺琴窓宿雨晴治  
書招遠意知共楚狂行

送清涼上人

何意欲歸山道高繇境勝花空覺性了月靜知心證永  
夜出禪吟清猿自相應

送李丞使宣州

結駟何翩翩落葉暗寒渚夢裏春穀泉愁中洞庭雨聊  
持剡山茗以代宜城醕

五言送至洪沙彌遊越

知爾學無生不應傷此別  
相逢宿我寺獨往遊靈越  
早  
晚花會中經行剡山月

七言送皇甫侍御曾還丹陽別業

雲陽別夜憶春耕  
花發菱湖問去程  
積水悠揚何處夢  
亂山稠疊此時情  
將離有月教絃斷  
贈遠無蘭覺意輕  
朝右要君持漢典  
明年北墅可須營

白蘋洲送洛陽李丞使還

蘋洲北望楚山重千里廻輶止一封臨水情來還共載  
看花醉去更相從罷官風渚何時別寄隱雲陽幾處逢  
後會那應似疇昔年年覺老雪山容

送履霜上人還金陵西山

攜錫西山步綠莎禪心未了奈情何湘宮水寺清秋夜  
月落風悲松栢多

送辨聰上人還廣陵

莫學休公學遠公了心須與我心同隋家古柳數株在



看取人間萬事空

送清勵上人遊福建

禪子自矜禪性成  
將來擬照建溪清  
南看閩樹花不落  
更取何緣了妄情

送顧道士遊洞庭山

見說洞庭無上路  
春遊亂踏五靈芝  
含桃風起花狼籍  
正是仙翁晷散時

送邢台州濟

海上仙山屬使君  
石橋琪樹古來聞  
他時畫出白團扇  
乞取天台一片雲

送柳察諫議叔

東城南陌強經過  
怨別無心亦放歌  
明日院公應問我  
閑雲長在石門多

送柳淡扶侍赴洪州

此子素少宦情共予有西山之好

中林許師友忽阻夙心期  
自顧青緇好來將黃鶴辭少  
年輕遠涉世道得無欺煙雨孤舟上晨昏千里時  
離魂

渺天末相望在江湄無限江南柳春風卷亂絲

同李司直題武邱寺兼留諸公與陸羽之無錫

陵寢成香阜禪枝出白楊劍池留故事月樹即他方應  
世緣須別栖心趣不忘還將陸居士晨發泛歸航

夏日題鄭谷江上納涼館

迢遙山意外清風又對君若爲於此地翻作路岐分別  
館琴徒語前州鶴自群明朝天畔遠何處逐閑雲

太湖館送殷秀才赴舉

春風洞庭路搖蕩暮天多衰疾見芳草別離傷遠波詩  
名推首薦賦甲擬前科數日聞天府山衣製芰荷

送重釣上人遊天台

漸看華頂出幽賞意隨生十里行松色千重過水聲海  
容雲正盡山色雨初晴事事將心證知君道可成

早春送顏主簿遊越東兼謁元中丞

輕舸趣不已東風吹綠蘋欲看梅市雪知賞柳家春別  
意傾吳醕芳聲動越人山陰三月會內史得嘉賓

同顏使君清明日遊因送蕭主簿

誰知賞嘉節別意忽相和暮色汀洲遍春情楊柳多高  
城戀旌旆極浦宿風波惆悵支山月今宵不再過

送道琚上人還金陵

一與鍾山別山中得信稀經年求法後及夏問安歸野  
實充甘膳池花當綵衣慈親莫返拜外禮欲無為

送裴邕之上京

辭山偶世清挾策忽西行帆過隋江疾衣沾楚雪輕尚

文須獻賦重道莫論兵東觀今多事應高白馬生

送珍上人還天竺兼寄廣通上人秦山人

江寺名天竺多居躡遠蹤春帆依柳浦輕履上蓮峰  
禪子兼三隱空書共一封因君達山信應向白雲逢

送張孝廉赴舉

名在諸生右家經見素風春田休學稼秋賦出儒宮  
別路殘雲濕離情晚桂叢明年石渠署應繼叔孫通

送劉司法之越

蕭蕭鳴夜角驅馬背城濠雨後寒流急秋來朔吹高三  
山期望海八月欲觀濤幾日西陵路應逢謝法曹

送簡栖上人之建州覲使君舅

亂峰江上色羨爾及秋行釋氏惟真子郗家許貴甥  
花新雨淨帆葉好風輕千里依元舅迴潮亦有情

海人以木

帆葉為

登開元寺樓送崔少府還平望驛

登望思慮積長亭樹連連悠揚下樓日杳映傍帆煙入

夜四郊靜南湖月待船

送王居士遊越

野性配雲泉詩情屬風景  
愛作爛漫游閑尋東路永何  
山最好望須上蕭然嶺

雜言重送皇甫侍御曾

人獨歸日將暮孤帆帶孤嶼  
遠水連遠樹難作別時心  
還看別時路

送演上人之撫州覲使君叔



臨川內史憐諸謝爾在生緣比惠宗遠別應將秦本去  
幽尋定有楚僧逢停船夜坐親孤月把錫秋行入亂峰  
便道須過大師寺白蓮池上訪高蹤

送大寶上人歸楚山

厭上烏橋送別頻湖光爛熳望行人欲將夜舸陪嘉月  
肯住空林伴老身獨鶴翩翩翻飛不定歸雲蕭散會無因  
從何得道懷惆悵莫是人間屢見春

送侯秀才南遊

芳草隨君自有情，不關山色與猿聲。  
為看巖子灘頭石，曾憶題詩不著名。

別洞庭維諒上人

白雲關我不關他，此物留君情最多。  
情着春風生橘樹，歸心不怕洞庭波。

康造錄事宅送太祝姪之虔吉訪兄弟

阮咸別曲四座愁，賴是春風不是秋。  
漫漫江行訪兄弟，猿聲幾夜宿蘆洲。

冬日梅溪送裴方舟宣州

平明正馬上村橋  
花發梅溪雪未消  
日短天寒愁送客  
楚山無限路遙遙

送韋向睦州謁獨孤使君沆

才子南看多遠情  
閑舟蕩漾任春行  
新安江色長如此  
何似新安太守清

送至嚴山人歸山

初到人間柳始陰  
山書昨夜報春深  
朝朝花落幾株樹

惱殺禪僧未證心

送僧遊揚州

平明擇鉢向風輕  
正及隋堤柳色行  
知爾禪心還似我  
故宮春物肯傷情

杼山集卷四

欽定四庫全書

杼山集卷五

唐 釋皎然 撰

兵後餘不亭重送盧孟明遊江西

并序

孟明常引支子元道人修習禪心兼餌芝朮遂與予有  
棲山之契其宦情未遣故勸勉之

攜手曾此分恍如隔胡越倫侯古封邑榮盛風雨歇饑  
飢號空亭野草生故轍如何此路岐更作千里別馮軾  
望遠道春山無斷絕朝行入郢樹夜泊依楚月佳士持



操高揚才日昭晰離言何所贈盈滿有虧缺時節傷蟪蛄芳菲忌鷦鷯予思鹿門隱心跡貴冥滅頽顏反芝木昔貌成冰雪歲晏期爾來銷聲坐巖穴

別山詩

并序

時因主人寄風溪蘭若與道士石脇峰相鄰禪僧仙師時得道會至秋中值外緣有請別山懷舊遂有是詩

山翁亦好禪借我風溪樹採藥多近峰汲泉有春渡幽僧時相偶仙子或與晤自許戰勝心彌高獨遊步如何

區中事奪我林棲趣辭山下復上戀石行仍顧宿昔情  
或乖庶幾跡無誤松聲莫相誚此心冥去住

五言同袁高使君送李判官使迴

庾公歡此別路遠意猶賒為出塘口柳榮歸府中花馳  
陽照古堞遙思凝寒筇延步下前渚沂觴流淺沙湖光  
引行色輕舸傍殘霞

五言陪顏使君餞宣諭蕭常侍

江濤凋瘵後遠使發天都昏墊宸心及哀矜詔命數恤



民驅急傳訪舊枉征艫外鎮藩條最中朝顧問殊文皆  
正風俗名共溢寰區已事方懷闕歸期早戒塗繁筵咽  
水閣高蓋擁雲衢暮色生千嶂秋聲入五湖離歌猶宛  
轉歸馭已踟躕今夕庾公意西樓月亦孤

奉陪顏使君修韻海畢東溪泛舟餞諸文士

諸侯崇魯學羔鴈日成群外史刊新韻中郎定古文

魯公

著書依切韻起東  
字脚皆列古篆

菁華兼百氏鱣素備三墳國語思開

物王言欲致君研精業已就歡宴惜應分獨望西山去

將身寄白雲

五言今上初登極歲送皇甫孝廉赴選

孝廉即故大夫之子

行應會府春欲勸及芳辰北極天文正東風漢律新少年逢聖代歡笑別情親況是勲庸後恩榮襲爾身

五言同楊使君白蘋洲送陸侍御士佳入朝

久愛吳興客來依道德藩旋師聞杖屨歸路憶轅轅舊佩蒼玉在新歌白芷繁今朝天地靜北望重飛翻

五言雪夜送海上人常州覲叔父上人殷仲文後

繼世風流在傳心向一燈望雲裁袖慣翫雪步花能交  
戰情忘久銷魂別未曾明朝阮家集知有竹林僧

五言送常清上人還舒州

瀟徐林反

人思爾法楚信有迴船估客親宵語閑鷗偶晝

禪經聲舍石激塵尾拂江煙常說歸山意誅茅廬霍前  
五言峴山送崔子向之宣州謁裴使君

楚思入詩清晨登峴山情秋天水西寺古木宛陵城琴  
匣應將往書車亦共行吾知江太守一顧重君名

五言送嚴明府入關謁黎京兆

春日異秋風何為怨別同潮迴芳渚沒花落畫山空旅  
候聞嘶馬殘陽望斷鴻應思右內史相見直城中

五言送邱秀才遊越

山情與詩思爛熳欲何從夜舸誰相逐空江月自逢春  
期越草秀晴憶剡雲濃便擬將輕錫携居入亂峰

五言送楊校書還濟源

妖烽昨日靜故里近嵩邱楚月搖歸夢江楓見早秋鄉

心無遠道北信減離憂  
禪子還無事辭君買沃州

五言送楊遂初赴選

秋風吹別袂客思在長安  
若得臨觴醉何須減瑟彈  
秉心凌竹栢仗信越波瀾  
春會文昌府思君每北看

五言送贇上人還京

久遊春草盡還寄北船歸  
沙鳥窺中食江雲入淨衣  
秦原山色近楚寺磬聲微  
見說翻經館多聞似者稀

五言送廣通上人遊江西

香爐七嶺秀秋色九江清自古多禪隱吾常愛此行尋  
師經鄂渚受請到青城離別人間事何關道者情

五言送羅判官還壽州幕

君章才五色知爾得家風故里旋歸駕壽春思奉戎天  
寒長虵伏飈烈文虎雄定頌張征虜桓桓戡難功

五言送李秀才赴婺州招

山開江色上孤賞去應遲淶水近吳榜秋風入楚詞猿  
清獨宿處木落遠行時見說東陽守登樓為爾期

五言送薛逢之宣州謁廢使

六月鵬盡化鴻飛獨冥冥  
秋烽家不定險路客頻經  
牛渚何時到漁船幾處停  
遙知詠史夜謝守月中聽

五言送德守二叔姪上人還國清寺覲師

道賢齊二阮俱向竹林歸  
古偈穿花線春裝卷葉僧  
墟廻水寺佛隴啟山扉  
愛別吾何有人心強有違

五言同明府章送沈秀才還石門山讀書

身為郢令客心許楚山雲  
文墨應經世林泉漫誘君  
欲

隨樵子去惜與道流分肯謝申公輩治詩事漢文

五言送吉判官還京赴崔尹幕

江南梅雨天別思極春前長路飛鳴鶴離帆聚散煙清  
晨趨九陌秋色望三邊見說王都尹山陽辟一賢

五言送裴判官赴商幕

商洛近京師才難赴幕時離歌紛白紵候騎擁青絲會  
喜疲人息應逢猾虜衰看君策高足自此煙霄期

五言送李喻之處士洪州謁曹王



獨思賢王府遂作豫章行雄鎮廬霍秀高秋江漢清見  
聞驚苦節艱故傷遠情西邸延嘉士遺才得正平

五言送唐贊善遊越

田園臨漢水離亂寄隋關今日煙塵盡東西又未還長  
亭百越外孤棹五湖間何處遊芳草雲門千萬山

五言送韋秀才

晨裝行墮葉萬里望桑乾舊說涇關險猶聞易水寒黃  
雲戰後積白草暮來看近得君苗信時教旅思寬

五言送陳秀才赴舉

諸侯懼削地選士皆不羈  
休隱脫荷芰將鳴矜羽儀  
甲科爭玉片詩句擬花枝  
君實三楚秀承家有清規

五言烏程李明府水堂同盧使君幼平送樊上人

遊五臺

身將劉令隱經共謝公翻  
有此宗師在應知我去存  
問心常寂樂為別豈傷魂  
獨訪華泉去秋風入鴈門

五言送李季良北歸

風吹殘柳絲孤客欲歸時掩抑楚絃絕離披湘葉衰前  
軍猶轉戰故國杳難期北望鴈門雪空吟平子詩

五言送淳于蘭陵覲省

歡言欲忘別風信忽相驚柳浦歸人思蘭陵春草生擷  
芳心未及視枕戀常盈此去非長路還如千里情

五言送至洪沙彌赴上元受戒

上元江中蔡州有梁戒壇

不肯資章甫勝衣被木蘭今隨秣陵信欲及蔡州壇野  
寺鐘聲遠春山戒足寒歸來次第學應見後心難

五言九日同盧使君幼平吳興郊外送李司倉赴

選

重陽千騎出送客為踟躕曠野多搖落寒山滿路隅晴  
空懸舊旆秋色起菱湖幾日登司會揚才盛五都

五言送盧孟明還上都

江臯北風至歸客獨傷魂楚水逢鄉鴈平陵憶故園征  
驂嘶別館落日隱寒原應及秦川望春華滿國門

五言送李少賓赴舉

豈謂江南別心如塞上行苦雲搖陣色亂木攪秋聲周  
谷雨未散漢河流尚橫春司遲爾策方用靜妖兵

五言留別閻士和

不慣人間別多應忘別時逢山又逢水只畏却來遲

五言送李道士

常隨山上下忽限江南北共是忘情人何繇肯相憶

七言送裴參軍還下邳舊居

北望煙鋪驃騎營虜烽無火楚天晴此時千里西歸客

泗上春風得及耕

七言送文會上人還富陽

悠悠渺渺屬寒波  
故寺思歸意若何  
長憶孤洲二三月  
春山偏愛富春多

七言送維諒上人歸洞庭

從來湖上勝人間  
遠愛浮雲獨自還  
孤月空天見心地  
寥寥一水鏡中山

七言九月八日送蕭少府歸洪州

明日重陽今日歸  
布帆絲雨望霏霏  
行過鶴渚知堪住  
家在龍沙意有違

七言同顏魯泛舟送皇甫侍御曾

維舟若許暫從容  
送過重江不厭重  
霜簡別來今始見  
雪山歸去又難逢

五言送孫侍御遊越

不知持斧客吟會  
是何情  
丹陛恩猶在  
滄洲賞暫行  
江橈隨月泛  
山策逐雲行  
佳句傳零雨  
詩流許盛名

五言送顏處士還長沙覲省

西候風信起三湘孤客心  
天寒漢水廣鄉遠楚雲深  
服綵將侍膳擷芳思滿襟  
歸人忘艱阻別恨獨何任

五言送還本上人遊江西

欲廣分何教心將江漢期  
雲招望寺處月待沂盃時  
真侶誰傷別降猿汝自悲  
多應過廬阜幽賞却來遲

五言送路少府使京兼覲侍御兄

國賦推能吏今朝發貢湖  
佇瞻雙闕鳳思見栢臺烏  
樹



向秦關遠江分楚驛孤榮君有兄弟相繼騁長途

五言於成原從送盧士舉

落日獨歸客空山走馬嘶蕭條古關外岐路更東西大  
澤雲寂寂長亭雨淒淒君還到湘水寒夜滿猿啼

五言送烏程李明府得陟狀赴京

驛吏滿江城深仁見此情士林推玉振公府薦氷清為  
政移風久承恩就日行仲容綸綍貴南巷有光榮

五言送裴秀才往會稽山讀書

一身齋萬卷編室寄煙蘿硯滴穿池小書衣種楮多吟  
詩山響答泛瑟竹聲和鶴板求儒術深居意若何

五言送崔詹事論之上都

崔嘗典  
吳興

金虎城池在銅龍劍珮新重看前浦柳猶憶舊洲蘋遠  
思秦雲暮歸心臘月春青園昔遊處惆悵別離人

五言京口送盧孟明還揚州

蕭蕭北風起孤棹下江濱暮客去來盡春流南北分萋  
萋御亭草渺渺蕪城雲相送日千里空山獨望君

五言送沙彌大智游五臺

童年隨法侶家世本儒流  
章句三生學清涼萬里遊  
雲歸龍沼暗木落鴈門秋  
長老應相問傳予向祖州

五言送臬上人遊越

雲泉誰不賞獨見爾情高  
投石輕龍窟臨流笑鷺濤  
折荷為片席灑水淨方袍  
剡路逢禪侶多應問我曹

五言送潘秀才之舒州

楚水清風生揚舲泛月行  
荻洲寒露彩雷岬曙潮聲東

道思才子西人望客卿從來金谷集相繼有詩名

五言送王山人遊廬山

千里訪靈竒山資亦相隨  
葉舟過鶴市花漏宿龍池  
峰頂應閑散人間足別離  
白雲將世事吾見爾心知

五言送道契上人之越覲大夫叔

楚僧推後輩唐本學新經  
外國傳香氎何人施竹瓶  
秋風別李寺春日向柯亭  
大阮今為郡看君眼最青

五言送沙彌長文遊京

白版年猶小黃花褐已通若為詩思逸早欲似休公邁  
俗多真氣傳家有素風應須學心地宗旨在關東

五言秋日送擇高上人往江西謁曹王

超然獨遊趣無限別山情予病不同賞雲閑應共行齋  
容秋水照香氎早風輕曾被陳王識遙知江上迎

七言送如獻上人遊長安

關中四子教猶存晁說新經待爾翻為法應過七祖寺  
忘名不到五侯門閉尋鄠杜看修竹獨上風涼望古原

高逸詩情無別怨春遊從遣落花繁

七言日曜上人還潤州

送君何處最堪思孤月停空欲別時  
露茗猶芳邀重會寒花落盡不成期  
鶴令先去看山近雲愛初飛到寺遲  
莫倚禪功放心定蕭家陵樹誤人悲

七言寺院聽胡笳送李殷

一奏胡笳客未停野僧還欲廢禪聽  
難將此意臨江別無限春風葭莢青

七言送僧釋

斜日搖揚在柳絲，孤亭寂寂水逶迤。  
誰堪別後行人盡，唯有春風起路歧。

七言荅裴評事澄荻花間送梁肅拾遺

波上荻花非雪花，風吹撩亂滿袈裟。  
如今歲晏無芳草，獨對離樽作物華。

七言送勝雲小師

昨日雪山記爾名，吾今坐石已三生。  
少年道性易流動，

莫遣秋風入別情

雜言誚士和別

今日同明日隔何事悠悠久為客君憐溪上去來雲我  
羨磷磷水中石

五言送吳馮遊京

北期何意促蕙草夜來繁清月思淮水春風望國門此  
時休旋逸萬里忽飛翻若憶山陰會孤琴為我援

七言送僧遊宣州



楚山千里一僧行  
念爾初緣道未成  
莫向舒姑泉口泊  
此中嗚咽為傷情

五言宿支硎寺上房

上方精舍遠共宿  
白雲端寂寞千峰  
夜蕭條萬木寒山  
光霜下見松色月  
中看却與西林別  
歸心即欲閑

杼山集卷五